

LISTOVI...

GRAČANIČKI GLASNIK
časopis za kulturnu historiju

Broj 54
Godina XXVII
Novembar, 2022.
[str. 337-348]

© Monos 2022

LISTOVI...

Listovi gračaničkog kalendara od 1. 5. do 8. 11. 2022.

8. 5. 2022.

JU Osnovna muzička škola Gračanica – uspješan nastup na Beogradskom festivalu harmonike

Festival već šestu godinu zaredom organizuje Udruženje ljubitelja harmonike „Akordeon“ iz Beograda. Na Festivalu nastupaju učenici, studenti, nastavnici, koncertni umjetnici i predavači iz Srbije i inostranstva, s ciljem da kroz koncertnu, umjetničku, naučnu i stručnu djelatnost predstave javnosti najreprezentativnija djela svjetske i domaće muzičke literature pisane za harmoniku. Iz Osnovne muzičke škole Gračanica nastupili su učenici: Lejla Mehurić (klavir), Tarik Čalić, Osman Mulahusejnović, Naid Muratović, Amel Girotić i Mesud Šehić (harmonika), sa svojim mentoricama: Dženanom Subašić, Mirzetom Sakan i Almom Kurtić.

14. i 15. 5. 2022.

Nakon dvije godine pauze u Gračanici je uspješno realizovan 23. festival dječijeg teatra Bosne i Hercegovine.

U dva dana nastupili su mladi glumci iz više gradova i odigrali ukupno 12 predstava, u kojima je viđeno mnogo talentovanih dječaka i djevojčica i mnogo lijepih priča sa jakim porukama. Žiri u sastavu Irfan Kasumović, Novica Bogdanović i Fatima Softić ove godine dodijelio je iste nagrade u dvije kategorije–1. za profesionalno i 2. za neprofesionalno vođene dječije dramske grupe. Nagrada za predstavu u cjelini pripala je: 1. Mostarskom teatru mladih sa predstavom “Sjetva” (profes. vođena grupa) i 2. Katoličkom školskom centru “Sveti Josip” Sarajevo sa predstavom “Priča o knjigama” (neprofesionalno vođena grupa); Nagrada za ansambl igru pripala je predstavama: 1. “Crtež generacije” koju je izvelo Pozorište mladih Tuzle i 2. OŠ Hasan Kikić Gračanica i predstavi “Bajka o dva Lj”; Nagrada za umjetničko-pedagoško vodstvo pripala je 1. Emini Kovačević iz Mostarskog teatra mladih i 2. Ani Dolić iz KŠC “Sveti Josip” Sarajevo; Nagradu za originalni dramski tekst dobio je 1. Tode Nikoletić sa tekstom “Svirko Svemirko–bajka o čarobnom sviraču” iz Gradskog kazališta mladih Vitez i 2. Marija Šorša za predstavu “Bajka o dva Lj” koju je izvela OŠ Hasan Kikić; Glumačka nagrada pripala je 1. Emini Šahdanu iz Viteza za ulogu Svirka, predstava “Svirko Svemirko–bajka o čarobnom sviraču” iz Gradskog kazališta mladih Vitez i

2. Mateji Kozarić koja je igrala ulogu bolesne knjige iz KŠC "Sveti Josip" Sarajevo, Nori Hrustanović koja je igrala ulogu male knjige također KŠC "Sveti Josip" Sarajevo te Nini Praljak koja je igrala čiču Artu iz osnovne škole "Sveti Franjo" Tuzla. Specijalnu nagradu festivala dobilo je Gradsko amatersko kazalište **Županja** za predstavu "Ivica i Marica u začaranoj šumi" (Izvor: Radio Gračanica).

17. 5. 2022.

Nakon dvogodišnje pauze zbog pandemije, ponovo Sajam „Grapos exspo“ u Gračanici

Sajam je otvoren u prisustvu velikog broja privrednika, predstavnika vlade Federacije i Vlade TK, obrtničke komore Hrvatske, češke ambasade i drugih visokih gostiju. Na 120 štandova rokom ove trodnevne privredne manifestacije, iz ostale prateće sadržaje, predstavilo se 315 izlagača iz 7 država. Snažnu podršku sajmu pruža vlada TK, dok suorganizator manifestacije Grad Gračanica čini sve da se održavanje sajma nastavi jednako uspješno kao i ranije.

24. 5. 2022.

„Klaus Lehman“ Gračanica – ugrađuje i održava fotonaponske elektrane

U aktuелnoj energetskej krizi, sve više privrednih subjekata odlučuju se na instaliranje fotonaponskih elektrana u svojim pogonima. Fotonaponske elektrane, snage su od 300 do 630 kilovat sati, imaju višestruke prednosti, uložena sredstva vraćaju se za 8 godina. Gračanička kompanija „Klaus Lehman“ (osnivač i vlasnik mr. sc. Kemal Hamzić), specijalizovana je za elektro-monterske radove, godinama poznata po takozvanim pametnim instalacijama, već se afirmisala na širem tržištu kao pouzdan partner za ugradnju, instaliranje i održavanje fotonaponskih elektrana i danas ima „pune ruke posla“. U poslovnim zonama Gračanice inženjeri „Klaus lehmana“ instalirali su fotonaponske elektrane u firmama „Trgovir“, „Suman“, „Varipast“, „Terasit“, „Plastoflex“, „Kane-

tex“, a uskoro počinju radovi i na TC „Etna“. Fotonaponske elektrane u Gračanici, sa drugim partnerima do sada su instalirale sljedeće kompanije „Širbegović inženjering“, „Bema Ba“, „Ambra“, „Plastex“, „Furnirfix“ i „Jadrina“. Uzimajući u obzir svih 12 spomenutih kompanija koje koriste fotonaponske elektrane, Kemal Hamzić kaže: „Računica govori, da mi trenutno imamo 5 megavata jeftinije, ekološki zdravije, obnovljive električne energije za period od 25. godina. Tvrdim, ovaj vid električne energije jeftiniji je za 30-60 posto od one i Elektropriivrede.“ (prema podacima: H. Čalić, „Avaz“)

25. 5. 2022.

Svečano obilježen Dan odbrane Gračanice

Dan ranije u organizaciji Sportskog saveza i Grada Gračanica u saradnji sa srednjim školama, danas je upriličena memorijalna šetnja na Zečev gaj, gdje je odata počast poginulim i na spomen-obilježje položeno cvijeće. Danas su brojne delegacije na Zečevom gaju odale počast stradalim herojima. Svečano obilježavanje je započelo tradicionalnim prijemom zlatnih ljiljana kod Gradonačelnika, a nastavljeno na Centralnom spomen-obilježju Odbrambeno-oslobodilačkog rata 1992.-1995. Prigodan govor održao je Gradonačelnik Nusret Helić, a potom izveden kulturno umjetnički program i položeno cvijeće. Nakon polaganja cvijeća upriličena je promocija 53. broja „Gračaničkog glasnika“, koji je u cjelini posvećen tridesetoj godišnjici svih tih događaja. Tokom dana gradska delegacija je položila cvijeće i na spomenik ubijenoj gračaničkoj mladosti „Mensur i Hava“, a također su obišli i Šehidsko mezarje Šabuša.

25. 5. 2022.

Promocija 53. broja „Gračaničkog glasnika“ – tema broja: 30 godina od 1992.

S obzirom na temu broja, koji je posvećen 30. godišnjici prelomnih događaja za Bosnu i Hercegovinu i Gračanicu, koji su se odigrali

1992. godine, promocija Časopisa organizovana je u sklopu obilježavanja 25. maja Dana odbrane i u okviru majskih manifestacija pod nazivom „Dani Gračanice“. Pored zainteresovanih čitalaca Časopisa, promociji su prisustvovali i ključni članovi ratnog vojno-političkog rukovodstva (1992. – 1995.): Hazim Vikalo, predsjednik Ratnog predsjedništva, Faruk Širbegović, dopredsjednik Izvršnog odbora i komandant Civilne zaštite, Ibrahim Nurikić, načelnik Opštinskog štaba TO i Operativne grupe dva Gračanica i Faruk Huskanović, načelnika Stanice javne bezbjednosti, koji se pojavljuju u časopisu sa svojim memoarskim zapisima o ratnoj Gračanici. Nakon predstavljanja sadržaja broja, koje je obavio član Redakcije Edin Šaković, uvodno izlaganje pod naslovom „Kako se sjećati 1992. – slučaj Gračanice“ podnio je glavni urednik Časopisa prof. dr. Omer Hamzić, a potom su svoja sjećanja na 1992. izložili Hazim Vikalo i Faruk Širbegović, pohvalivši koncept ovog broja, ali i dostignuća ovog časopisa u proteklih 27 godina.

31. 5. 1992.

U predmetu "Fortuna Gračanica" objavljena prvostepena presuda zbog organiziranog kriminala

Kantonalni sud Tuzla je u nastavku suđenja po optužnici Kantonalnog tužilaštva Tuzlanskog kantona u naznačenom predmetu objavio prvostepenu i nepravosnažnu presudu za Bakira Pjanića i Ibrahima Muharemovića, izrekavši im jedinstvene kazne zatvora u trajanju od po sedam (7) godina zbog krivičnog djela organizirani kriminal, počinjenu vezi sa produženim krivičnim djelom zloupotreba položaja i ovlašćenja i krivičnim djelom pranje novca. Sud je objavio i prvostepenu presudu i za bivšeg stečajnog upravnika u fabrici „Fortuna“ Gračanica Muhameda Hadžića i izrekao mu kaznu zatvora u trajanju od 3 godine i 6 mjeseci zbog krivičnog djela zloupotreba položaja i ovlašćenja počinjenog u sticaju sa krivotvorenjem službene

isprave. Također, u objavi prvostepene presude je navedeno da se po pravosnažnosti presude od Bakira Pjanića oduzima imovinska korist stečena krivičnim djelom u iznosu od 320.000 KM, a od Muharemovića u iznosu od oko 156.000 eura.

Podsjećamo, optužnicom se Bakir Pjanić (*direktor firme „Fortunatto“*) i Ibrahim Muharemović (*direktor firme „Fortob“ i član uprave „Fortune“*) terete da su bili dio grupe za organizirani kriminal koju je vodio i organizirao ranije osuđeni Safet Pjanić. U deset tačaka optužnice se navodi da su članovi ove grupe, u periodu dužem od 8 godina, od 2009. do 2017. godine, zajedničkim i planskim djelovanjem osnivali paralelna i vezana privredna društva kako bi koristili sve potencijale i poslovne veze dioničkog društva „Fortuna“. Oni su činjenjem većeg broja krivičnih djela pribavili imovinsku korist za sebe ili osnovane firme, a pri čemu je pričinjena imovinska šteta za gračaničku „Fortunu“ u iznosu od oko 4,5 miliona KM, te stvorene obaveze radi neplaćenih direktnih poreza i doprinosa za radnike „Fortune“ u iznosu od oko 5,5 miliona KM. U šestoj i jedanaestoj tački optužnice se i bivšem stečajnom upravniku u Fortuni Muhamedu Hadžiću na teret stavlja da je počinio krivična djela zloupotreba položaja i ovlašćenja i krivotvorenje službene isprave, ali ne kao član pomenute grupe. Safet Pjanić je ranije pravosnažno osuđen na kaznu zatvora u trajanju od 5 godina i od njega je oduzeta imovinska korist, pribavljena krivičnim djelom u iznosu od oko 116.000 eura. Ranije su pravosnažno osuđeni i drugi članovi ove grupe te je Huseinu Nurikiću–finansijskom direktoru i članu uprave „Fortune“ izrečena kazna zatvora u trajanju od 2 godine i 10 mjeseci, dok su Aliji Nurikić–knjigovodi „Fortune“ i Redži Delimehiću–direktoru firme „Fortex“, izrečene kazne zatvora u trajanju od po jednu godinu. (Izvor: www.tip.ba)

31. 5. 2022.**Održana 18. sjednica Gradskog vijeća: o priznanjima za Dan Grada i komunalnim javnim preduzećima**

Osim spomenutih, vijećnici su razmatrali još petnaestak tačaka dnevnog reda, koje su se mahom odnosile na kadrovske izmjene nekih organa gradske uprave i mjesnih zajednica kao npr. Komisija za Budžet, Savjet mjesne zajednice Rašljeva itd. Što se tiče priznanja, odlučeno je da se priznanja za ratne zasluge ubuduće dodjeljuju za Dan odbrane Grada, 25. maj. Bilo je i nekoliko izvještaja i informacija. Izmjenom odluke o radnim tijelima Gradskog vijeća od jedne obrazovane su dvije nove komisije: prva za etički kodeks i druga za ravnopravnost spolova, prava i slobode čovjeka, predstavlja i pritužbe. Osim izvještaja o poslovanju javnih preduzeća „Komus“ i „Vodovod i kanalizacija“, vrijedi spomenuti još dva izvještaja koje su vijećnici osvojili na ovoj sjednici: o radu Gradskog pravobranilaštva i o provedenim podsticajnim mjerama i njihovim efektima u poljoprivredi. „K znanju“ su primljene i sljedeće informacije: o prikupljanju i odlaganju komunalnog otpada iz domaćinstava i privrednih subjekata, o radu i vršenju nadzora Gradske inspekcije za 2021. godinu, o radu Općinskog suda u Gračanici, te o stanju javne rasvjete na gradskom području. Vrijedi spomenuti i pitanje koje je pokrenuto na početku sjednice, a vezano je za zagađenje zraka u Donjoj Orahovici, prouzrokovano čestim paljenjem divlje deponije u blizini sela, na lijevoj obale Spreče, područje opštine Petrovo (RS). Zaključeno je da se od nadležnih u komšijskoj opštini Petrovo zatraži da što hitnije uklone spomenutu divlju deponiju. (izvor: Sl. portal Gradske uprave Gračanica)

2. 6. 2022.**Obilježavanje 2. juna Dana opštine**

Nakon uobičajenog polaganja cvijeća na spomen obilježja u centru Gračanice, održana je svečana akademija na kojoj su se svojim pozdravnim govorima, vijećnicima i gostima

obratili predsjedavajući Gradskog vijeća Nihad Krajinović i gradonačelnik Nusret Helić, a zatim je prikazan dokumentarni materijal o najvažnijim aktivnostima i rezultatima Gradske uprave u prethodnih 12 mjeseci. Ovogodišnja gradska priznanja dodijeljena su: JU MSŠ Gračanica i "Kanetex" d.o.o. Gračanica (*Zlatna plaketa*), Zvonimiru Šnoblu, Fikretu Džananoviću i Adilu Kurtoviću Beli (*Zlatna značka*), dok je posebno priznanje *Počasni gost* pripalo Baronesi Arminki Helić, koje će joj biti uručeno naknadno. U okviru akademije izveden je prigodan kulturno-umjetnički program. Zapaženo je učesće članova baletskog ansambla Narodnog pozorišta i Udruženja umjetnika „Bellarte“ iz Sarajeva. Istog dana u okviru obilježavanja ovog datuma obavljeno je svečano otvaranje novoizgrađenog sistema vodosnabdijevanja u gradskim naseljima Bijela Polja, Drafnići, Seljanuša i Gornja Lohinja. Kako je rečeno, osigurano je kvalitetnije snabdijevanje vodom za preko 1000 novih i starih potrošača. Ukupna vrijednost projekta je 800.000 KM, od čega je UNDP BiH izdvojio sredstva u ukupnom iznosu od 320.000KM, Ministarstvo poljoprivrede, vodoprivrede i šumarstva Tuzlanskog kantona 235.000 KM, te Grad Gračanica 190.000 KM.

2. 7. 2022.**Akademik prof. dr. Izet Mašić, primljen u Evropsku akademiju znanosti i umjetnosti – oblast medicine**

Riječ je o rođenom Gračanliji (sin. poznatog gračaničkog alima i publiciste Muhameda Mašića), dugogodišnjem profesorom Medicinskog fakulteta u Sarajevu, jednom od najcitiranijih profesora Sarajevskog univerziteta, sa nekoliko desetina knjiga i više od 1000 objavljenih naučnih i stručnih radova. Učesnik je mnogobrojnih naučnih i stručnih skupova u zemlji i inostranstvu itd. Osnivač je i urednik nekoloko prestižnih časopisa iz oblasti medicine, član je redakcije mnogih

uglednih publikacija i časopisa, među kojima je i naš „Gračanički glasnik“. Na Generalnoj skupštini Akademije u Salzburgu (Academia Scientiarum et Artium Europaea), pored Mašića, diplome akademika u oblasti medicinskih znanosti iz Bosne i Hercegovine dobili su: prof. dr. Aida Kulo Ćesić i prof. dr. Almir Badnjević. (izvor: republikainfo.com.)

2. 7. 2022.

Održana 19. sjednica Gradskog vijeća: izmjena Budžeta za 2022., stanje saobraćajnica...

Po predviđenim izmjenama, Budžet Grada za 2022. godinu planiran je u iznosu od 24.806.669. KM, što je više za 872.536 KM. Kada je u pitanju struktura prihoda, uočljivo je da su porezni prihodi veći za 583.934 KM zbog povećanja indirektnih poreza u odnosu na Smjernice ministarstva finansija TK. Između ostalog, rebalansom se vrše promjene kod većeg broja stavki kao i novo kreditno zaduženje u iznosu od 1.200.000 KM. Na sjednici je usvojena Odluka o broju i visini stipendija učenicima srednjih škola i studentima za školsku 2022/2023. godinu po kojoj će se dodijeliti ukupno 125 stipendija iz Budžeta grada. U informaciji o stanju putne infrastrukture na području grada Gračanica sa stanjem horizontalne i vertikalne signalizacije, koja je prezentirana Vijeću, pored obilja statistike nalazi se i podatak da je putni pravac Gračanica – Malešići – Lukavica, odlukom vlade Federacije BiH od 21. 3. 2018, izgubio dotadašnji status regionalne ceste II reda, te da je do danas ostao u kategoriji „nerazvrstanih“. Nije jasno kako je ova izmjena u lokalnoj javnosti prošla nezapaženo. Tek krajem marta prošle godine reagovala je gradska administracija Gračanice uputivši Ministarstvu trgovine, turizma i saobraćaja Tuzlanskog kantona „zahtjev za prekatgorizaciju navedene ceste kako bi ista ponovo dobila status regionalne ceste.“ Kao i obično, sve je na čekanju.

7. 7. 2022.

Gradu Gračanica još jedno prestižno priznanje – Certifikat „Kruna razvoja privrede“

Priznanje dodjeljuje LRC Business Intelligence System kao najveća i najstarija bonitetna agencija u Bosni i Hercegovini koja se bavi prikupljanjem i obradom podataka. Pored državnih institucija, Agencija prati i sve javno dostupne portale u Bosni i Hercegovini kako bi ih objedinili i upotpunili platformu LRC Business Intelligence System. Na osnovu podataka koje prikupljaju, vrše analize kojim izrađuju projekat Općine/gradovi i biznis. „Grad Gračanica je ispunio sva četiri parametra koja pratimo, a koja se odnose na porast prihoda, porast izvoza, porast broja uposlenih i porast broja kompanija što je za svaku pohvalu jer je prethodni period bio jako težak za samu privredu, počevši od pandemije i svih drugih stvari koje su se dešavale. Ono što želimo istaći jeste da se na području grada Gračanica nalaze preko 44 kompanije koje prave prihod preko 5 miliona KM a to su kompanije koje su itekako vrijedne pažnje i koje su nosioci privrede ovog grada. Certifikat „Kruna razvoja privrede“ nema vrijednost (cijenu) i ne može se kupiti. Na odabir nosioca ovog priznanja ne utiče ljudski faktor jer se podaci prikupljaju i obrađuju softverski prema zadatim parametrima. Na osnovu pokazatelja kojima raspolazemo, Grad Gračanica je zaslužen ponio titulu „Kruna razvoja privrede“, izjavila je Generalna direktorica Jadranka Kuljanin prilikom uručivanja priznanja gradonačelniku Gračanice Nusretu Heliću.

14. 7. 2022.

Počele „Ljetne večeri pod lipama Gračanice“

Manifestacija je otvorena gostovanjem Murisa Varajića, virtuoza na gitari, koji je oduševio gračaničku publiku. Manifestacija je programski bogatija u odnosu na dosadašnje. Skoro svakog trećeg dana tokom jula

i avgusta domaća publika bit će u prilici da proprati neki scenski, muzički ili književni program. Organizator je Bosanski kulturnu centar, a najviše programa bit će izvedeno na otvorenoj sceni u centru grada ili na terasi Osman-kapetanove medrese.

28. 7. 2022.

Propast još jedne firme u Gračanici: na red je došao i „Olimp“

Nekadašnji ponos Gračanice sa nekoliko stotina zaposlenih, fabrika modne konfekcije, koja je iznikla iz krojačke zadruge pedesetih godina prošlog stoljeća, a izrasla kao pogon sarajevskog preduzeća „Alija Hodžić“, kasnije „Alhos“, da bi se nekoliko godina pred agresiju i rat izdigla na Olimp mode i ponijela to ime, nastavljajući sa radom u savremenom i vrhunski opremljenom pogonu, izgrađenom i sredstvima samodoprinosu za zapošljavanje koji su izdvajali svi radnici Gračanice – definitivno je na koljenima. To je poslije „Građevinara“, „Feringa“ i „Fortune“ još jedna gračanička firma „iz vremena socijalizma“, koja je uspjela preživjeti rat, ali nije uspjela preživjeti mir, privatizaciju i sve ostalo što je pratilo i prati te procese. Firma se već duže vrijeme nalazi u teškoj položaju sa milionskim dugovanjima. Za 28. juli bila je zakazana prva javna prodaja cijele fabrike sa opremom i zemljištem koju je zaplijenila Poreska uprava Federacije BiH radi namirenja svojih milionskih potraživanja. Kao i obično u ovakvim situacijama, niko se ne pita ko će namiriti dugovanja prema radnicima, ko će im povezati staž... Već viđeno mnogo puta u ovoj zemlji. Nakon prvog pokušaja „Olimp“ nije prodan, radnici su protestovali, njih oko 150, blokirali su ulaz u fabriku, tražili su samo svoja zaostala potraživanja. Niko iz uprave preduzeća nije se oglasio. Ponovo je na potezu Poreska uprava: javna prodaja „Olimpa“ – drugi pokušaj... „Zar se to može desiti od posla čaršiji...“ samo je jedan od zaječljivih komentara na lokalnim društvenim mrežama.

1. 8. 2022.

U TK za sve učenike od 1. do 9. razreda osnovne škole besplatni udžbenici

U Vladi su obećali i povećanje plata prosvjetarima na sva tri nivoa obrazovanja i prijem učitelja i nastavnika koji 10 i više godina čekaju status zaposlenika na neodređeno vrijeme, povećanje plaća zaposlenicima na sva tri nivoa obrazovanja, te besplatni udžbenici od 1. do 9. razreda osnovnih škola.

4. 8. 2022.

Federalna vlada: podrška Gračanici za realizaciju tri značajna projekta u

Potpisani su ugovori o sufinansiranju sanacionih radova na nacionalnom spomeniku „Konak“ u Gračanici (sjedište Gradske uprave) u iznosu od 70.000 KM i za sanaciju klizišta i puta Malešići – Lukavica odobreno je 150.000 KM. Bit će podržana i sanacija još jednog nacionalnog spomenika – Hadži Džaferove (Lipljanske) džamije u Gračanici. (prema izvještaju Radio Gračanice)

7. 8. 2022.

Svečano obilježena 28. godišnjica bitke na Visu

Obilježanje je započeto 5. avgusta prigodnim vjerskim programom i druženjem boraca na izletištu Vis. Sljedećeg dana nastavljeno je sportskim takmičenjima. U nedjelju, trećeg dana položeno je cvijeće na spomen obilježje na Visu, gdje je izveden prigodan kulturno-umjetnički program u organizaciji Udruženja mladih „Sijedi krš“ Babići.

13. i 14. 8. 2022.

Uspješno organizovan 16. međunarodni festival folkloru i sevdaha u Lukavici kod Gračanice („Lukavica 2022“)

Domaćin i organizator Festivala je i ove godine bilo Kulturno-umjetničko društvo Lukavica. Učešće su uzele ekipe iz 8 država: Turske, Srbije, Crne Gore, Hrvatske, Slovenije, Češke, Ukrajine i Bosne i Hercegovine.

Prije početka Smotre (festivala) održan je Okrugli sto na temu „Čuvanje narodnih običaja, plesova i igara“, kome je prisustvovala i ministrica kulture, sporta i mladih TK Ivana Mijatović, istakavši značaj ovakvih manifestacija, društveni, kulturni, tradicijski, ne samo za lokalne sredine, već i šire. I pored loših vremenskih prilika, publika je uživala u različitim igrama, različitim nošnjama, različitim kulturama... Organizatori su uputili riječi zahvalnost ministrici Mijatović, gradu Gračanica, općini Doboj istok i mnogobrojnim drugim donatorima i sponzorima ove manifestacija. Posebnu zahvalnost iskazali su medijskom pokrovitelju Super TV koja redovno prati ovaj festival i tako omogućujući da se njegovi dometi vide širom svijeta – (Izvor: Super medija)

14. 8. 2022.

Izgrađen i pušten u rad novi vodovod u Rašljevi

Tim povodom održan je zbor građana, koji su na skroman način obilježili i ovu radnu pobjedu, poslije izgradnje nove džamije, najveću. Na zboru su imenovana upravljačka tijela vodovoda i iskazana zahvalnost svima koji su u protekle tri godine pomagali ovu akciju. U novi vodovod uloženo je oko 600.000 KM. Za ovu malu mjesnu zajednicu, kako je rečeno, to je bio veliki zalogaj. Ipak je hrabro krenula u ovu akciju, imenovala Građevinski odbor, koji je pripremio projektnu dokumentaciju i krenuo u prikupljanje potrebnih sredstava. Rezultat je, da je selo za nepune 4 godine dobilo vodovod. Sami građani Rašljeve obezbijedili su 40% sredstava, a 60% su sredstva iz Budžeta grada Gračanice, Tuzlanskog kantona, Vlade Federacije BiH i ostalih donatora. Iz ovog vodovoda snabdijevat će se ukupno 227 domaćinstava ove mjesne zajednice. Novi vodovod je urađen po svim propisima i praktično zadovoljava sve potrebe Rašljeve. Voda se crpi iz bušotine duboke 105 metara. Izgrađena su dva bazena, kapaciteta ukupno 230 kubika i pri-

marne mreže dužine 12 kilometara. General Armije BiH Fikret Muslimović inicirao je i vodio izgradnju više komunalnih projekata za bolji život u svom rodnom selu. U zadnjih nekoliko godina Rašljeva je obnovila lokalne puteve, školu, izgradila novu džamiju i napokon ovaj vodovod. „Ovo je za Rašljevu veliki projekat. Uvijek je postojala želja mještana da se izgradi vodovod jer je ovo bio prilično bezvoda kraj. Ovaj današnji dan je ustvari epilog našeg rada u proteklih 5 godina, rekao je na otvaranju Muslimović.“

20. 8. 2022.

Svečano otvorena džamija u gradskom naselju Korića Han u Gračanici

Medžlis IZ Gračanica, pružio je punu podršku izgradnji džamije i formiranju novog džemata u tom dijelu Gračanice. Džamija je izgrađena dobrovoljnim priložima i sredstvima džematlija i brojnih drugih vakifa, privrednih i drugih subjekata. Zahvaljujući agilnosti odbora za izgradnju i podršci džematlija, sagrađena je za manje od godinu dana. Munara na ovoj džamiji visoka je 28 metara, džamija ima 500 kvadratnih metara korisnog prostora i to prostor za namaze, prostoriju za vjersku pouku i stan za imama. Proklanjanju džamije prisustvovali su, osim domaćina iz Gračanice, brojni visoki gosti i vjernici iz svih krajeva BiH.

26. 8. 2022.

Nova ograda oko Hrama Svetog Vaznesenja Gospodnjeg u Gračanici

Radi se o sanaciji podzida i lijepo uređenoj ogradi u dužini od 30 metara, koja je bila već dotrajala i pomalo narušavala izgled te urbane gradske cjeline. Podsjećamo, crkva je izgrađena 1926. godine i ima status nacionalnog spomeniku Bosne i Hercegovine. „S obzirom da finansiranje ovih radova vrši isključivo Gradska uprava Grada Gračanica, zahvaljujem se gradonačelniku Nusretu Heliću i njegovim saradnicima, jedan dio sredstava oko 10 hiljada KM smo dobili od

Federalnog ministarstva za kulturu i sport, zaslugom Grada Gračanice koji su aplicirali za projekat, čija ukupna vrijednost premašuje 50 hiljada konvertibilnih maraka.” – rekao je za Radio Gračanicu, sveštenik i paroh ovo hrama Aleksandar Lučić, koji je nagovijestio sanaciju i uređenje unutrašnjih dijelova tog objekta.

31. 8. 2022.

Dvadeseta sjednica Gradskog vijeća Gračanica – prekinuta zbog nesaglasnosti u vezi sa pitanjem oko kojeg nesaglasnosti ne bi smjelo biti.

Na ovoj redovnoj sjednici vijećnici su trebali razmatrati nekoliko važnih pitanja, između ostalih i realizaciju Budžeta za prvih šest mjeseci ove godine, popuniti upražnjena mjesta u nekoliko upravnih odbora javnih preduzeća i ustanova, razmotriti pitanja znatbičevanja područja Grada toplotnom energijom, upoznati se sa privrednim kretanjima u prošloj godini, riješiti pitanje ponovne ostavke zamjenika predsjedavajućeg Gradskog vijeća itd. Međutim, „na početku sjednice, kako je izvijestio Fahro Kurtović, kod postavljanja vijećničkih pitanja i inicijativa, došlo je do različitog viđenja inicijative Gradonačelnika da se podrška ratnom komandantu Armije BiH Džemalu Jukanu, protiv koga sud u Doboj provodi neke sudske radnje, a vezano za ratna dešavanja 1992. – 1995. godina. SDA je predlagala da se inicijativa proširi i da se inicijativa proširi i da podrška i generalu Armije R BiH Fikretu Muslimoviću, koji je rodom iz Rašljeve jedne od mjesnih zajednica Grada Gračanica, koji se optužuje za slučaj Dobrovoljačka. Zbog nemogućnosti postizanja jedinstvenog stava i nakon, na momente žustre rasprave, sjednica je prekinuta. O nastavku sjednice će zasjedati Kolegij Gradskog vijeća i utvrditi termin nastavka sjednice.“ Vjerovatno, zbog nesuglasnosti unutar Kolegija, sjednica nije nastavljena u toku dana (31. 8.), a novi termin nije određen jer je u međuvremenu zvanično počela

predizborna kampanja. Doduše, vijećnici Gradskog vijeća uveliko se već bili u toj kampanji, što je pokazala i diskusija koja je rezultirala prekidom sjednice, u konkretnom slučaju na vrlo osjetljivom i ozbiljnom pitanju, mnogo ozbiljnijem od bilo čijih kandidatura i kampanja.

1. 9. 2022

Svečano obilježen Dan 111/221. brdske brigade

Svečanost je upriličena ispred Centralnog Spomen-obilježja odbrambeno-oslobodilačkog rata u Gračanici. Iako se ovaj datum, tek prije nekoliko godina našao u kalendaru obilježavanja značajnih datuma Grada, po tradiciji se obilježava dosta skromno, ali dostojanstveno. Ovoga puta prisutnim borcima i malobrojnim građanima obratio se gradonačelnik Nusret Helić i komandant Bataljona 111/221. gračaničke brigade Muris Trepanić. U kulturnom dijelu programa nastupio je Esed Kovačević sa dvije muzičke numere: “Bosna je duša svijeta” i “Ne daj se Bosno”, a glumac Irfan Kasumović interpretirao je monolog “Šehid” autora Merima Đulovića.

1. 9. 2022.

Okružno javno tužilaštvo Doboj (RS) pokrenulo istrage ratnih zločina koje su tokom rata (1992. – 1995.) navodno počinili branioči Gračanice na Ozrenu

Na saslušanje je već pozivano više lica, kako se saznaje, u svojstvu svjedoka ili potencijalno optuženih. Pozivi su intenzivirani krajem avgusta ove godine. Istražuju se okolnosti pod kojima je, navodno, izginuo nepoznat broj civila na Ozrenu od artiljerijskih granata sa položaja onih koji su branili Gračanicu. Među saslušanim bio je i ratni komandant 111/221. gračaničke brigade Džemal Jukan, koji bi, kako mu je saopšteno, mogao biti optužen za neke slučajeve po komandnoj odgovornosti. Teško je reći kakav će biti ishod svih tih istraga, usmjerenih na pripadnike Armije BiH širom Bosne i Hercegovine, ali je njihov

strateški cilj jasan: izjednačavanje krivice i relativiziranje svih zločina koje su počinili borci za Republiku Srpsku te promjena karaktera rata u Bosni i Hercegovini – uprkos svim haškim presudama. Ovo je izazvalo ne malu uznemirenost, ali i gnjev građana i boraca u Gračanici. Jasno je ko dan, pa i onima koji podižu optužnice da je Gračanica svjetla obraza izašla iz rata. Oni imaju neke druge ciljeve, ali sigurno neće uspjeti, poruka je iz Gračanice.

19. 9. 2022.

Zapažen nastup „Jadrine“ na internacionalnom sajmu namještaja MOW u Njemačkoj

Ova gračanička firma po prvi put je nastupila na tom sajmu koji se održava u njemačkom gradu Bad Salzfluenu. Jedan je od četiri izlagača koji predstavljaju namještaj iz Bosne i Hercegovine na toj privrednoj manifestaciji. Kolekcija „Jadrine“ nije ostala nezapažena po svom kvalitetu i dizajnu među 500 izlagača iz cijelog svijeta. Izložila je namještaj od hrasta, bukve, jasena i američkog oraha, u programima Avolo, Trevi i Sorano. Ostvareni su novi poslovni kontakti ali i konkretni izvozni aranžmani. Inače, „Jadrina“ je od 2008. godine u potpunost promijenila proizvodni program i strategiju poslovanja. Prioritet se daje izvozu i proizvodnji masivnog namještaja od hrastovog drveta. U međuvremenu, preduzeće je obnovilo mašinski park i opremilo se za izradu zahtjevnijih proizvoda. Danas izvozi svoje proizvode u Englesku, Francusku, Holandiju, Njemačku, Austriju, Češku, Dansku i Švicarsku. Spada u kategoriju srednje velikih preduzeća i trenutno zapošljava 236 radnika.

19. 9. 2022.

Dani evropskog naslijeđa

Ministarstvo za kulturu, sport i mlade Tuzlanskog kantona i ove godine obilježava Dane evropskog naslijeđa, koji se kroz razne manifestacije obilježavaju u evropskim

zemljama i imaju za cilj da privuku pažnju javnosti i podignu svijest o obavezi očuvanja zajedničke evropske baštine. Između ostalog, ove godine u pet gradova Tuzlanskog kantona realizovani su brojni programi, radionice, okrugli stolovi, predstave i koncerti, pod zajedničkim nazivom “Bosanski saz kao dio evropskog naslijeđa” koji za cilj imali promociju bosanskog saza i svega što se veže uz taj instrument, koji se duboko ukorijenio u bh. kulturu i tradiciju. Manifestaciju su zajednički realizovati Bosanski kulturni centar TK Tuzla, Narodno pozorište Tuzla, Zavod za zaštitu i korištenje kulturno-historijskog i prirodnog naslijeđa TK, Muzej Istočne Bosne, Bosanski kulturni centar Živinice, Bosanski kulturni centar Gračanica, Centar za kulturu i informisanje Srebrenik i Centar za kulturu „Ahmed Muradbegović“ Gradačac. Na priredbi u Gračanici, koja je održana u Bosanskom kulturnom centru, nastupilo je 5 sazlija i naš poznati interpretator svedalinki Esad Kovačević.

23. 9. 2022.

Nova cisterna za potrebe civilne zaštite na području Grada Gračanice

Cisterna će služiti za potrebe službe za komunalne poslove, za potrebe zaštite od požara, kao i za potrebe snabdijevanja stanovništva pitkom vodom. Uloženo je oko 90.000 KM i to iz Gradskog budžeta 70% i od Kantonalne uprave Civilne zaštite 30%.

23. 9. 2022.

Sezona grijanja u Gračanici – od početka oktobra

To je saopšteno iz firme Eko Toplana Gračanica, u kojoj su izvršene sve pripreme za početak grejne sezone. Nakon priprema koje će trajati tri do četiri dana u planu je da od nedjelje 2. oktobra sistem grijanja bude u punom kapacitetu u zavisnosti od vanjske temperature zraka. Dotle će se izvršiti sve potrebne tehničke i funkcionalne pripreme sistema daljinskog grijanja. Nezvanično se

saznaje da toplana neće značajnije mijenjati cijenu svojih usluga tokom ove grejne sezone.

2. 10. 2022.

Opći izbori 2022. – u Gračanici protekli sasvim regularno

U biračkom spisku upisano je 41. 296 birača, koji su glasali na 63 biračka mjesta za članove Predsjedništva BiH, Parlamentarnu skupštinu BiH, Predstavnički dom F BiH i Skupštinu TK. Po podacima Gradske izborne komisije, na glasanje je izašlo 51,24% birača, što je manje u odnosu na prethodne opštinske i parlamentarne izbore, a što je opet nešto više u odnosu na prosjek Federacije BiH. Na listi za izbor članova Predsjedništva bilo je 5 kandidata, a na listi za Parlamentarnu skupštinu BiH 23 partije i 129 kandidata, za Federalni parlament 18 političkih subjekata i 115 kandidata, za skupštinu TK 22 politička subjekta i 588 kandidata.

6. 10. 2022.

Endoskopski aparat za Opću bolnicu „Dr. Mustafa Beganović“ u Gračanici

Sredstva za nabavku uređaja obezbijedena su iz Gradskog budžeta i uz podršku Udruženja poslodavaca. Aparat omogućuje da se minimalnim invazivnim pristupom operišu kamenci žuči, kile, upale slijepog crijeva, a u novije vrijeme i određene maligne bolesti debelog crijeva. S obzirom na trend laparoskopskih operacija, ovom nabavkom značajno se upotpunjuje opremljenost ove bolnice, koja je na usluzi pacijentima iz Gračanice, Doboj Istoka i dijelova Gradačca, Lukavca i Srebrenika.. Vrijednost donirane opreme je oko 120.000 KM, a u proceduri je još jedan dio za dijagnostiku u vrijednosti od oko 40.000 KM.

11. 10. 2022.

Nastavak 20. sjednice Gradskog vijeća Gračanica

Prema izvještaju novinara TK Fahrudina Kurtovića, na početku sjednice jednoglasno je prihvaćena inicijativa Gradonačelnika

Helića da se pruži podrška komandantu Džemalu Jukanu, protiv kojeg je poveljen postupak pred Okružnim sudom Doboj u vezi sa nekim ratnim zločinima iz minulog rata. Prihvaćena je i ostavka zamjenika predsjedavajućeg Gradskog vijeća Edina Šehića, koja se vuče još od 19. aprila ove godine. Kao službeni razlog za ostavku navedene su nepravilnosti o primjeni zakona o ravnopravnosti spolova, jer su obje funkcije u rukovodstvu Gradskog vijeća obnašale osobe istog spola. Vijećnici su prihvatili izvještaj o polugodišnjoj realizaciji budžeta Grada i izvještaj o utrošku budžetske rezerve za isti period. Prema mnoštvu cifara iz prezentiranog materijala, vijećnici su imali razloga za zadovoljstvo. Od planiranih prihoda na godišnjem nivou u iznosu od 17.852.564 KM, za prvih 6 mjeseci ove godine ostvareno je 8.015.580 KM, što je otprilike u nivou plana. Planirani iznosi 13.488.066 KM a, ostvareni su u iznosu od 4.836.102 KM, što su u osnovi pozitivna kretanja iako neke obaveze iz prvog polugodišta, očigledno nisu izvršene. U nastavku sjednice, prihvaćena je inicijativa o uspostavljanju trajne saradnje sa općinom Darica (Republika Turska) Gradsko vijeće je podržalo odluku o visini naknade članovima i predsjedniku Gradske izborne komisije za fiskalnu 2023. godinu. Prihvaćena su i rješenja o imenovanju upravnih ili nadzornih odbora u javnim preduzećima i ustanovama Vodovod i kanalizacija, Domu zdravlja i Gradskoj apoteci. Izvršene su i promjene u više komisija Gradskog vijeća. U izvještajno-informativnom dijelu sjednice raspravljalo se o izvještaju o radu Gradskog vijeća za 6 mjeseci, informacija o privrednim kretanjima u prošloj godini i informacija o snabdijevanju građana toplotnom energijom – koje po pravilu ne privlače nikakvu pažnju vijećnika.

14. 10. 2022.**„Zlatne ruke Gračanice“ – Održan 5. sajam ženskog poduzetništva**

Učešće na sajmu su uzela gračanička udruženja žena, udruženje pčelara, obdaništa, osnovne i srednje škole. Kulturno-zabavnim programom, sajam su uveličali učenici osnovnih i srednjih škola te mališani iz obdaništa „Naša djeca“ i UG – Centar za obrazovanje i odgoj djece „Genijalci“. Sajam je svečano otvorio Gradonačelnik Helić, koji je naglasio značaj poduzetničke sredine kakva je Gračanica što dokazuje i tradicionalno održavanje ovog sajma. Organizator sajma je Grad Gračanica u saradnji sa udruženjima žena grada Gračanica, osnovnim i srednjim školama, obdaništem „Naša djeca“, SOS dječijim selom Gračanica, Omladinskim centrom, Turističkom zajednicom i BKC-om.

28. 10. 2022.**Asfaltiranje novih dionica puteva i ulica, te vodovodne infrastrukture na području Gračanice**

Zahvaljujući pogodnom vremenu, ove jeseni intenzivno se realizuju projekti sanacije infrastrukture, koji se finansiraju iz gradskog budžeta. Za te namjene, u ovoj godini planirana je stavka od milion KM. Nešto od planiranog je već urađeno, na nekim dionicama radovi su u toku dok su neki još u fazi ugovaranja. U Lukavici je završena sanacija glavnog lokalnog puta na dionici Ograđenica – Prnjavor koji je jače oštećen za vrijeme elementarnih nepogoda, odnosno klizišta, 2014. godine. Sanacija bi se izvela mnogo ranije, ali se čekala stabilizacija terena, po preporuci geologa. Sanirana su i dva veća oštećenja na istoj dionici puta. U zaseoku Prnjavor, uz učešće građana, izvršena je sanacija puta do izletišta Dolina. Osim Lukavice, trenutno se na gradskom području rade još tri putna pravca u Piskavici i tri u Gornjoj Orahovici (Mehinbašići – Avdići, put prema mezarju Husići i put u naselju Dobrnjići. Ovih dana završena je i sanacija prilaza po-

ligonu i osnovnoj školi u Pribavi, a u fazi realizacije su i planirani radovi na putevima u naseljima Halidovići i Softići. Što se tiče same Gračanice, već su završeni sanacioni radovi u jednoj ulici na Hajdarovcu i put u Pašalićima. Ugovori su potpisani i uskoro se očekuje početak sanacije još nekoliko ulica (Mustafe Rešidbegovića, Dudić, Halilovići, Bazen), a slijedi i uređenje pijace. Uskoro kreće i sanacija putne infrastrukture u Doborovcima (Monj), Prijekom Brdu i Orahovici. Ovih dana otvorit će se i radovi na izgradnji rezervoara za vodu od 150 m³ u MZ Donja Orahovica u vrijednosti od oko 200.000,00 KM, što će uz već izgrađeni potisni i povratni cjevovod, čija je vrijednost 93.000,00 KM poboljšati snabdijevanje Donje Orahovice vodom. Vršiti se i zamjena cjevovoda na vodovodu Birkovac.

31. 10. 2022.**Održana 21. sjednica Gradskog vijeća Gračanica: Nacrt Budžeta za 2023.**

Prvo su vijećnici usvojili Odluku o izmjenama i dopunama Budžeta Grada za 2022., a potom i Nacrt Budžeta za 2023. godinu. Prema usvojenim izmjenama, obim Budžeta za tekuću godinu iznosi 17.703.269 KM, dok je u Nacrtu za 2023. predviđen u iznosu od 16.365.227 KM. Pada u oči da je u Nacrtu za narednu godinu planiran Budžet u nešto manjem iznosu u odnosu na tekuću godinu – što je, dakako, nerealno. Objašnjenje je da se radi o prenosu sredstava iz prethodnih godina i da će se stanje do kraja budžetske godine promijeniti, a u toku rasprave o Nacrtu Budžeta za 2023. godinu, svakako i korigovati. U nastavku, Gradsko vijeće je usvojilo nekoliko odluka o imenovanju i razrješenju članova vijeća mjesnih zajednica Gračanica i Stjepan Polje. Iako su prošli nezapaženo, dva materijala koji su se našli na dnevnom redu ove sjednice donose zanimljive podatke koji se tiču stanja u dvije važne oblasti. Prvi je Izvještaj o primjeni zakona o uslovima i postupku legalizacije bespravno izgrađenih građevina iz kojeg vidimo da su u periodu od

18. 9. 2021. do 17. 10. 2022. godine nadležnoj službi podnesena 243 zahtjeva iz oblasti legalizacije objekata, a najviše za naknadnu urbanističku saglasnost (119). Zahtjevi su efikasno rješavani, a bespravna izgradnja je i dalje prisutna, istina u manjem obimu nego ranije. Drugi materijal bila je informacije o starim i iznemoglim licima u stanju socijalne potrebe na području grada Gračanica. Prema statističkim podacima iz juna 2022. godine na ovom području živjelo je 7637 starih lica. I ovdje je uočljiv ubrzaniji proces starenja stanovništva koji će se nastaviti i u budućnosti, pa se pokazuje potreba za većom brigom i boljim organizovanjem pri rješavanju problema starih lica, zaključuje se u tom materijalu.

1. 11. 2022.

Puštena u rad nova autobuska stanica u Gračanici

Radi se o višemilionskoj investiciji Društva za prevoz putnika „Avis“ d.o.o. Gračanica, a namijenjena je svim korisnicima autobusnog saobraćaja. „Avis“ je pod različitim nazivima i statusom, poslovao na postojećoj autobuskoj, nekada željezničkoj stanici popularnog „Čire“ u samom centru grada takoreći od samog svog osnivanja, nakon ukidanja čire 1968. godine, nakon čega će uslijediti izgradnja novog puta do željezničke stanice Sočkovac. Kako je za medije izjavila Sauda Avdić, članica uprave „Avisa“, vrijednost investicije je dva miliona KM, ne računajući zemljište. Autobuska stanica je izgrađena i uređena na jednom dijelu lokacije „Fering“ i ima funkcionalne prilaze kako sa magistralnog puta Doboju Tuzla, tako i iz pravca grada. U sklopu nove autobuske stanice putnici i posjetitelji će imati dodatne sadržaje kao što su: kaffe bar, supermarket, mjenjačnica, bankomat, i sl. sa velikim parking prostorom ispred objekta. Izmještanje autobuske stanice iz

centra grada, značajna je urbana promjena nabolje: smanjuju se saobraćajne gužve i zagađenje zraka za lokalno stanovništvo, a putnicima u tranzitu se skraćuje vrijeme putovanja do krajnje destinacije. Sa novom autobuskom stanicom centar grada bit će povezan kružnim gradskim linijama, za što će biti potrebno izgraditi nova i urediti postojeća autobuska stajališta. Na dosadašnjoj lokaciji autobuske stanice, planira se veliki parking, što je do sada bila urgentna potreba u samom gradskom jezgri. Gračanlije se nadaju da će nakon ovih promjena njihov grad „prodisati“.

8. – 11. 11. 2022.

Nakon dvije godine pauze zbog pandemije, ponovo tradicionalni vašer u Gračanici

Kao i prethodnih godina organizacija vašera je povjerena JP „Komus“ d.o.o. Gračanica. Vašarski sadržaji priređuju se, po tradiciji, u samom centru grada. Samo prvog dana (8. novembra) organizuje se stočni vašer–pijaca na lokaciji Stankove bare pored magistralnog puta u području Stjepan Polja, gdje se, inače, organizuju i druge poljoprivredne izložbe i smotre. Kako je zapaženo, vašer je bio posjećeniji nego ikada (valjda i zbog dvogodišnje pauze). Posjetiocima i onima koji su došli da nešto prodaju, na ruku je išlo jako lijepo vrijeme za ovo doma. U organizaciji sajma, međutim, trebalo bi u narednom periodu mnogo štošta poboljšati, počevši od rješavanja pitanja javnih klozeta i higijene, pa do proširenja prostora poboljšanja ugostiteljske ponude koja se ne smije prepustiti stihiji.

Posljednja vijest (24. 11. 2022.): nakon svih postizbirnih preslagivanja, SDA neće biti u vlasti na državnom i federalnom nivou. “Ipak se kreće!” (Galileo Galilei)